

Gara peui se coula gioja
 A j' vneis voltè i garat,
 A fario lor 'l boja
 Con la rabia del folat.
 Pr' dè ant l' eui a coula cara,
 Osserveje a caminè,
 A la moda pi bisara
 Tuti consti galinè.
 O pr Giulia, o pr Gianeta
 A san pa regnè ant la pel,
 E 'l so cheur giamai s' achietta,
 Fin ch' a j' an butà l' anel.
 A sta gent a j' andaria,
 Pr guarije 'l mal ch' a l' an,
 Una brustia, o raspa, o stria,
 E grateje 'l bufabran.

**Le Donne disgraziate per i cattivi Mariti,
 ossia mal recapitate.**

CANZONE LIV.

Povre done, a van bin compatie
 Quand ancapito d' oimo lordon!
 L' an bel fè, bel toirè, l' an bel die,
 Tant a perdo la penna e 'l savon;
 O ch' a venta ch' a seufro d' ingiurie.
 E ch' a tenno la berta ant 'l sach,
 O cianciand ai faran dè ant le furie,
 Tant da fesse butè j' os a bsac.
 Ai na j' è ch' a l' an la testa scrussia,
 E ch' a son bei e bon sansosi,
 A s' anmoco quandbin la famia
 L' abia poch e ch' a staga a pati,
 Pur ch' a peusso fè lor gaudineta,

E ste alegher ansem a j' amis,
 La soa gent a la buto an burleta,
 E s' na curo pa pi che di' mnis.

Motobin a son desdait a coul vissi
 D'anbronsesse com' tanti bestieui,
 Ciupinand a so gust e caprissi
 Fin che 'l vin veul surtie pr j' eui;
 Arivà peui a cà, che gabele
 Con la fomna s' ai treuva da di!
 E 'l ciacot a furnis con d' patele,
 L' armanach marca sempre cosi.

Ai n' è d' atri inimis dla fatiga,
 Ch' ai pias trop 'l mestè del Miclas,
 Senza crussi, lontan d' ogni briga,
 Veulo mach mangè, beive, e andè a spas;
 A pretendo ch' la fomna a s' massa
 Al travai, e ch' a s' leva la pel,
 E lor atri butè la bedrassa
 Senza aveje da rompse 'l servel.

S' a l' an nen una fomna paria,
 Seve nen sti sturdi cosa fan?
 A s' angigno d' raspè e portè via
 Tut d' ant cà lo ch' ai ven pr le man;
 E lo vendo, o ch' a van angagelo
 A quaich osto, giudè, o patè;
 Coust meinagi lor s' aplico a felo,
 Prechè senza sudor a fan dij dnè.

Peui a van a giughè o divertisse
 Con d' fumele, ch' ai fan poch onor;
 O ch' a coro soens a tratnisse
 Con dij safer, ch' a son parai d' lor;
 Cousta l' è soa gran compagnia,
 Ch' a desidero seira e matin,
 Pr podeje sgairè an alegria,
 E fè arlan del so poch san Crispin.

A l'avran una fomna grassiosa,
 Brava e bela com' un angelat,
 Meinagera, modesta e sustosa,
 Dominâ da gnun spirit folat;
 Pur coui brombo faran amicissia
 Con quaich' una pi brutta ch' la neuit,
 Mal forgiâ, pienna d' fum e malissia,
 Ch' a l'avrà nè manere, nè deuit.

Buchè un poch coui tavan ch' a cudisso
 Tuta quanta la smanna al travai,
 E fasend so dover a cumpisso
 Bel e bin tuti i di so giornai;
 Ma sicom' a l'an mach mesa testa.
 So guadagn d' sing, o ses, o set di
 A lo fan sauté tut a la festa,
 S' a n' aveisso tre vote bin d' pi.

Quanti ancora, mach pr bisaria,
 Abandonò le fomne e masnà,
 E s' la sbigno da stermà, e van via
 Bin lontan, o ch' a van fè 'l soldà!
 Coul l'è un cheur e una benevolensa
 Al so sangh (oh che turch ch' a son mai!)
 L'è una cosa ch' un a ved pr esperiensa,
 Gnanca a fesse da ij' stess' animai.

Tanti e tanti, marlait ch' un ai toca,
 A sauto e giuro com' tanti cartonè,
 Una bona parola d' an boca
 Ai seurt mai, tant sbocà com' a son;
 Minca poch van disend d' parolasse,
 Ch' a fario scapè fin i can,
 Le pi sporche, sacrileghe e grasse,
 Coul a l'è 'l bon esempi ch' a dàn.

Coule fomne ch' a l'an cousti tuso
 D' un umor stravagant e mutin,
 E ch' a s' vedo tavota fè 'l muso,

E d'ojas, com' a fan i mastin,
 Coula ancor l'è una gran penitensa,
 E una cros. ch' a l'è greva a portè.
 Pur a venta ch' a l'abio passienza,
 E pr forza sufri coui mortè.

Coui berdoja ch' a van atachesse
 A j' imprese, negossi e contrat.
 Ma siccom' a san pa meinagesse,
 Fan dij boro e sproposit da mat;
 E la fomna, marlait ch' a s' impacia.
 E ch' a veuja troveje da di,
 Ai daran dij sgrugnon su la faccia,
 O pr grassia la mando a durmì.

Vaire sonne ch' a l' an dla fiolansa,
 Ch' a l' anlevo, pur trop, mal e pes.
 Con gnun deuit, nè virtù, nè creansa,
 Nè timor, prchè ai guardo pa apres;
 E le mare, s' a veulo buteje
 Su la strà da porteje a bon fin,
 Cousti pare fan nen ch' armogneje
 Da la seira fin a la matin.

-Che desgrassia pr couste meschine.
 Quand a dàn ant un omo gelos!
 Coul l'è un vive tavota ant le spine.
 Ch' a peul nen esse pi doloros;
 A son gnanca padrone d' descòre
 Con quaich giovo o quaich om maridà,
 Sottoposte a ciapè tute j' ore
 Quaich verlera da coui malfidà.

Ma ventralo peui forse ch' i passo
 Pr bardot coust e coul ganivel.
 Ch' a caresso la fomna e l' ambrasso
 Pr rusieje la dota e 'l fardel?
 Consumà ch' a j' an coula sostansa,
 E ch' a j' è pi nen da fè sfars,

A la buco con mal a la pansa
 Com' un tros o rusi d' un pom mars.
 Quand a capito d' esse malavie
 Pr desgust, pr desgrassia, o pr stent,
 O ch' a son ant 'l numer dle gravie,
 Ch' andario tratà diferent,
 Ma coui rustich, ch' a l' an pers 'l giudissi,
 E ch' a son malgrassios, e brandè,
 A s' na pio pa vaire caprissi,
 E ch' a cherpo s' a veulo cherpè.
 L' an rason a piorè ste fumele,
 Ch' a l' an d' oimo cosi interessà,
 Ch' a van squasi mostrand le buele,
 Mal vestie, descause e strassà;
 Ma con cousti atacà a l' interesse,
 E ch' a l' an nè vergogna, nè onor,
 L' an pro bel tut 'l di lamentesse,
 A son ciorgn e pi dur ch' 'n strompor.
 D' atri a tenno le fomme sogete
 Com' i can da pajè atacà al las;
 Bin ch' a passo pr brave e pr chiete,
 Tant ai veulo concede gnun spas;
 A t' ij tenno li d' una manera
 Com' sa fusso servente o masnà,
 A l' an por ch' l' aria ai guasta la cera,
 O ch' a vado pr li a fè 'l marcà.
 Quand a van fè l' amor pr sponseje,
 Ai fan sent mila bone rason,
 Pià ch' a j' an, stan pa vaire a plineje,
 O lasseje pr là ant un canton;
 Prchè prest a comenso stofiesne,
 E gardeje com' a fa 'l can al gat,
 E s' a s' deis ch' a podeiso desfesne,
 A pagrio quaicosa sul pat.
 Fie, fie, ch' j' avi tanta veuja,
 E 'l gatij d' esse prest maridà,

Bin ch' 'l sangh ant le venne a v' beuja,
 Aspetè d' esse bin anformà;
 Prchè d' vote podria ariveve
 D' incontrene quaicun ancor pes
 Dlo ch' i v' abia savù racontève,
 E peui feve burlè ancor apres.

Frammento inedito sui pregi del Piemonte.

CANZONE LV.

I son pa pr deslodè
 Gnun pais, ch' i seu ch' ai n' è
 Ch' a l' an d' merit singlar;
 Ma son nen an tut del par.
 Quand 'l mond a fuss un moton,
 Coust pais a saria 'l rognon.
 La colina, ch' a j' è a Turin,
 A par giust un belissim giardin,
 Pienna d' fruta, fior e vis,
 Ch' a fan d' vin, da fè vni gris;
 E dle fabriche piantà,
 Ch' a fario una sità.
 J' è dij fium e dij torent
 Pr bagnè abundantement
 I giardin, j' ort e i prà,
 Fin i camp, e ancor le strà;
 Tant ch' ariva mach quaich an
 Ch' la suitina fa del dan.
 A j' è 'l Po, coul fium famos,
 Fra tanfi aistri 'l pi grandios,
 Che con d' barche e gros barcon
 A somministra d' provision
 Con bel comod a bon cont,
 E gran util al Piemont.